

## HOOFSTUK 25. DIE BINNEKANT EN DIE BUITEKANT

*"Onverstandiges, het Hy wat die buitekant gemaak het, nie die binnekant ook gemaak nie?" –*

**Luk. 11 :40**

Elke gees probeer om vir homself 'n gedaante of vorm te skep waarin sy lewe beliggaam is. Die uiterlike is die sigbare uitdrukking van die verborge, innerlike lewe. Die uiterlike word gewoonlik geken voor die innerlike. Deur die uiterlike word die innerlike ontwikkel en bereik dit sy volledige volmaking soos die apostel Paulus sê in **1 Kor.15:46**: *"Die geestelike ewenwel is nie eerste nie, maar die natuurlike; daarna die geestelike."* Om die regte verhouding tussen die innerlike en die uiterlike te verstaan en te handhaaf is een van die grootste geheime van die Christelike lewe.

As Adam in die paradys nie geluister het na die duiwel se versoeking nie, sou sy toets uitloop het op die volmaking van sy innerlike lewe. Dit was sy sonde, sy ondergang en die oorsaak van al sy ellende dat hy homself oorgegee het aan die mag van die sigbare, uiterlike wêreld. In plaas van sy geluk te soek in die verborge innerlike lewe van 'n hart waarin God se bevele geëer is, in die innerlike gesindhede van liefde en geloof, van gehoorsaamheid en afhanklikheid, het hy sy verlange gerig op die wêreld buitekant hom, op die genot en die kennis van goed en kwaad wat dit hom kon gee.

Alle valse godsdiens, van die mees verlaagde afgodediens tot die verbastering van Judaïsme en Christendom, het hierin sy wortel, dat wat uiterlik is, wat die oog kan streel of die verstand kan interesseer of die smaak kan bevredig, die plek inneem van daardie waarheid in die innerlike gedeelte, daardie verborge wysheid in die hart en lewe wat God soek en skenk.

Die groot kenmerk van die Nuwe Testament is dat dit 'n bedeling van die innerlike lewe is. Die belofte van die nuwe verbond is: *"Ek gee My wet **in hulle binneste** en skrywe dit **op hulle hart**."* (**Jer.31:33**). *"Ek sal julle 'n nuwe hart en 'n nuwe gees **in julle binneste** gee. En Ek sal my Gees **in julle binneste** gee."* (**Eseg.36:26**). Die belofte van onse Here Jesus was: *"Die Gees van die waarheid sal **in julle wees**."* (**Joh.14:17**). *"In dié dag sal julle weet dat **Ek in julle** is."* (**Joh.14:20**). Die dien van God bestaan in die gesindheid van die hart, in 'n hart waarin God die Gees van Sy Seun uitgestuur

het, 'n hart waarin die liefde van God uitgestort is, dat die ware saligheid gevind word.

Die binnekamer met sy verborge omgang met die Vader wat in die verborge sien, is die simbool en die oefenskool van die innerlike lewe. Die regte en getroue gebruik elke dag van die binnekamer sal die innerlike, verborge lewe sterk en bly maak.

In al ons godsdiens is die groot gevaar om meer tyd en belangstelling te gee aan die uiterlike middels as aan die innerlike werklikheid. Dit is nie die erns van jou Bybelstudie, dit is nie die veelvuldigheid of die erns van jou gebede of goeie werke wat noodwendig 'n ware geestelike lewe uitmaak nie. Nee, wat ons nodig het, is om te besef dat net soos God 'n Gees is, so is daar 'n gees in ons binneste wat Hom kan ken en aanneem, en wat gelykvormig kan word aan Sy beeld en deelgenoot kan word van dieselfde gesindhede van Hom as God, in Sy goedheid en liefde.

Laat dit vasstaan in jou gemoed dat ons hele saligheid bestaan in die openbaring van die natuur, lewe en Gees van Jesus Christus in ons innerlike en uiterlike nuwe mens. Dit alleen vernuwe en herstel die eerste lewe van God in die siel van die mens. Waar u ook al gaan, wat u ook al doen, tuis of daar buite in die veld, doen alles in die begeerte na eenheid met Christus, in navolging van Sy gesindhede en begeertes, en verlang na niks, begeer niks soveel nie as dit wat die gees en lewe van Christus in die siel oefen en vermeerder, en om alles in jou te laat verander in lyn met die gesindheid en gees van die heilige Jesus.

Beskou die skat wat jy in jou het, die Verlosser van die wêreld, die ewige Woord van God in jou hart verborge, as 'n saad van die Goddelike natuur wat die sonde en dood in jou moet oorwin, en weer die lewe van die hemel in jou siel moet opwek. Keer jou na jou hart en jou hart sal sy Saligmaker, sy God, in homself vind. Jy sien en voel niks van God nie omdat jy Hom buitekant soek, in boeke, in die kerk, in uiterlike oefeninge, maar jy sal Hom daar nie vind nie totdat jy Hom gevind het in die hart.

**Soek Hom in jou hart en jy sal nooit tevergeefs soek nie, want Hy woon daar, daar is die setel van Sy lig en Heilige Gees.**

*Gebed: "Here Jesus Christus, U is vir my meer belangrik as enigiets anders in my lewe. Ek begeer dat die saad van die Goddelike natuur in my sal oorwin teen die sonde, die vlees en die wêreld. Hier is ek. Ek soek na U in my hart. Laat ek U vind."*